



PRESIDÉNSIA  
KONSELLU  
MINISTRUS

VIII GOVERNU KONSTITUSIONÁL

Gabinete  
Porta-Voz

Komunikadu Imprensa

**Sorumutuk Extraordináriu Konsellu Ministrus nian iha loron 12 fulan-outubru 2020**

Konsellu Ministrus hala'o sorumutuk iha Palásiu Governu, iha Dili, no aprova ona **tetu agregadu no dezagregadu husi Orsamentu Jerál Estadu (OJE) tinan 2021 nian**, ne'ebé apresenta husi Vise-Ministra Finansas, Sara Lobo Brites. Tetu agregadu iha montante totál, dolar amerikanu rihun millaun 1,895 ne'ebé inklui empréstimu sira, hodi kobre ba nesesidade husi programa no prioridade nasionál sira ne'ebé define ona husi Governu Konstitusionál VIII, liului iha nível dezenvolvimentu kapitál sosiál, dezenvolvimentu ekonómiku, ne'ebé aliñada ho medida sira ne'ebé tau ona iha Planu Rekuperasaun Ekonomika, dezenvolvimentu infraestrutura bázika fundamentál, dezenvolvimentu ambientál, dezenvolvimentu institucionál no prosesu kona-ba reforma institucionál sira ne'ebé la'o hela. Husi montante totál OJE 2021, millaun 239,26 korresponde ba saláriu no vensimentu, millaun 421,49 refere ba bein no servisu, millaun 669,91 ba transferénsia pública sira, millaun 61,14 korresponde ba kapitál menór no millaun 503,20 ba kapitál dezenvolvimentu.

Vise-Ministra Finansas mós halo apresentasaun ida ba Konsellu Ministrus rezultadu husi relatórioi Sensu Agrícola tinan 2019 nian. Rekolla dadus husi setór agrikultura nian ne'e ho objetivu atu fó dalan ba definisaun política no estratéjika ida ba setór ne'e, atu apoia programa nasionál agrikultura husi Planu Estratégiku Dezenvolvimentu tinan 2011-2030, atu dezenvolve indikadór husi Objetivu Dezenvolvimentu Sustentável 2 (ODS 2)-Zero hamlaha no Agrikultura Sustentável, atu fornese dadus estatístiku kona-ba setór ne'e iha nível administrativu suku nian no fornese enkuadramentu ida ba setór agrícola nasionál. Rezultadu sira ne'e hatudu katak iha 141 738 propriedade agrícola, neebé 141 141 maka propriedade familiár no 597 partense ba instituisaun privada sira. Relatórioi ne'e hatudu katak 66% husi agregadu familiár nasionál iha atividade agrícola. Propriedade agrícola sira akupa estensaun ida ho ektare 219250. Munisípiu sira ho área propriedade agrícola familia ne'ebé boot liu maka Bobonaro, ho propriedade ektare rihun 41 liu, Ermera ho ektare rihun 40 liu no Baukau ho propriedade rihun 25 liu. Enkuantu munisípiu sira ne'ebé área agrícola menus liu maka Lautein no Manatutu, ho 8555 no ektare 3371. **REMATA**